

疆

識

畧

彊識畧七卷

崇陽吳楚材國賢編

謝所教受仲校

職官部上

官 演繁露云管也一職皆立一官使之典管也故
官舍所在皆名爲官五帝官天下是以天下爲公
而使仕者任之也

品秩 自太昊以龍紀官唐虞建官維百未分品秩
周官以九儀正邦國自一命至九命漢自中二千
石止二百石魏陳群立九品官人之法北齊九品
各分正從 國朝正一品太師太傅太保從一品

少師少傅少保太子太師太傅太保正二品太子少師少傅少保正三品太子賓客不專授但爲大臣加官兼官及贈官其餘官品俱見內外官職中入流 通典曰隋制九品自太師始焉謂之流內國朝正從一品至九品謂之入流即流內也

未入流 通典曰唐有流外勳品自諸錄事及五省內史始焉 國朝九品之外雜職官員謂之未入流即流外也

文散官 漢諸侯有功德優盛朝廷所敬異者賜位特進三公下隋文帝以爲散官今正一品初授特

進榮祿大夫陞授特進光祿大夫漢有光祿大夫
今從一品初授榮祿大夫陞授光祿大夫正二品
初授資善大夫陞授資政大夫加授資德大夫宋
太宗改通議爲通奉今從二品初授中奉大夫陞
授通奉大夫加授正奉大夫隋散官有通議正議
大夫今正三品初授嘉議大夫陞授通議大夫加
授正議大夫秦有中大夫大中大夫今從三品初
授亞中大夫陞授中大夫加授太中大夫正四品
初授中順大夫陞授中憲大夫加授中議大夫隋
散有朝議朝請今從四品初授朝列大夫陞授朝

議大夫加授朝請大夫唐有奉議郎今正五品初授奉議大夫陞授奉政大夫從五品初授奉訓大夫陞授奉直大夫正六品初授承直郎陞授承德郎隋有承務郎宣德郎今從六品初授承務郎陞授儒出身儒林郎吏才幹出身宣德郎唐有宣義郎宋有承事郎今正七品初授承事郎陞授儒出身文林郎吏才幹出身宣義郎隋有徵仕郎今從七品初授從仕郎陞授徵仕郎正八品初授迪功郎陞授脩職郎從八品初授迪功佐郎陞授脩職佐郎正九品初授將仕郎陞授登仕郎從九品初

授將仕佐郎陞授登仕佐郎初授散官俱于三年之後照例陞授其加贈考驗本人生前功績合得加授者照例給與

武散官 周禮天子六軍軍萬二千五百人其將皆命卿蓋在國稱大夫在軍稱將軍自晉獻公作三軍而公將上軍故有將軍之名今為散官正從一品同文官正二品初授驃騎將軍陞授金吾將軍加授龍虎將軍從二品初授鎮國將軍陞授定國將軍加授奉國將軍正三品初授昭勇將軍陞授昭毅將軍加授昭武將軍從三品初授懷遠將軍

陞授定遠將軍加授安遠將軍正四品初授明威
 將軍陞授宣威將軍加授廣威將軍從四品初授
 宣武將軍陞授顯武將軍加授信武將軍正五品
 初授武德將軍陞授武節將軍從五品初授武畧
 將軍陞授武毅將軍正六品初授昭信校尉陞授
 承信校尉從六品初授忠顯校尉陞授忠武校尉
 文勳 周禮王功曰勳齊梁始有勳品本酬戰士其
 後漸及朝流楚寵官有上柱國唐以為勳官今正
 一品左右柱國從一品柱國正二品正治上卿從
 二品正治卿正三品資治尹從三品資治少尹正

四品贊治尹從四品贊治少尹正五品脩正庶尹
從五品協正庶尹凡文官一品至五品應合授勳
者照依散官定擬奏聞給授

武勳 後魏有柱國大將軍令正從一品同文勳秦
有護軍都尉唐改上大將軍爲上護軍大將軍爲
護軍今正二品上護軍從二品護軍漢武帝置輕
車將軍唐置上輕車都尉及輕車都尉今正三品
上輕車都尉從三品輕車都尉漢武帝置騎都尉
唐置上騎都尉令正四品上騎都尉從四品騎都
尉隋置文散官爲驍飛雲武四騎尉今正五品騎

騎尉從五品飛騎尉正六品雲騎尉從六品武騎尉凡武官一品至六品應合授勳者照依散官定擬奏聞給授

封贈 武王克商追王太王王季故後代有追謚追尊之典兩漢逮今人臣亦有追贈之制漢宣帝思張賀掖庭收養封恩德侯此追封之始也 國朝

凡文官一品贈三代二品三品二代四品至七品一代各照見授職事依例封贈土官無封贈父祖例止給本人誥勅一品玉軸四軸二品犀軸三品抹金軸俱三軸四品抹金軸五六七品俱角軸二

軸五品已上授誥織用五色紵絲其前織文曰奉
天勅命用勅命之寶俱用升降龍文左右盤繞正
從一品曾祖母祖母母妻各封贈一品夫人正從
二品祖母母妻各封贈夫人正從三品各封贈淑
人正從四品母妻各封贈恭人正從五品宜人正
從六品安人正從七品孺人曾祖母母加太字

按漢崔篆母師氏通經學百家言王莽寵以殊禮
賜號義成夫人如淳云列侯子復為列侯母稱太
夫人蓋漢制也

貼黃 會典云國初置年職黃簿以便稽考永樂後
委官清理事例甚詳凡除官開寫年籍從軍脚色

赴內府清理明白寫黃仍寫內外貼黃與正黃
請用寶鈴記正黃送銅櫃收貯內外黃各置文簿
附貼記之貼黃升調襲替奏聞貼揭謂之續黃三
歲一次清理兵侍都御史翰林主事令各官親供
謂之清黃

宗室祿米 親王唐制歲該米四千八百石絹四千
八百疋綿四千五十斤宋制領節度使歲該穀二
千四百石錢四千八百貫絹二百疋綾一百疋羅
十疋綿五百兩今定米一萬石郡王唐制歲該米
七百石田六十頃宋制領觀察使歲該米一千一

百石錢二千四百貫絹二十疋綿五十兩今定米
二千石鎮國將軍唐制歲該米六百石田五十頃
宋制郡王子以下量材授官照官品高下給祿今
定米一千石輔國將軍唐制歲該米五百石田四
十頃今定米八百石奉國將軍唐制歲該米四百
石田二十五頃今定米四百石鎮國中尉唐制歲
該米三百石田十四頃今定米四百石輔國中尉
唐制歲該米二百石田八頃今定米三百石奉國
中尉唐制歲該米一百石今定米二百石公主及
駙馬食祿二千石郡主及儀賓食祿八百石縣主

及儀賓食祿六百石郡君及儀賓食祿四百石縣君及儀賓食祿米二百石俱米鈔兼支

公侯伯俸給

釋名公直也取其正直無私周書能

移於衆與百姓同之謂公能樹名生物與天道俱謂之侯率衆時作謂之伯子獨孽孽栖下之稱男任治事受王命爲君也漢艾亡秦大侯不過萬家小者五六百戶則封國以戶也唐封公侯無國土其加實封者則食其所封之戶分食諸郡以租庸調給 洪武初給官田量原定糧租分數收取後令公侯伯皆給祿米論功定數舊賜田還官永

二年令照文武官例米鈔兼支

文武官俸給 唐正元四年定百官月俸僖昭之亂
國用窘闕天祐中止給其半後唐孔謙以軍儲不
克請減半數而支實錢宋定非兼職皆一分實錢
二分折支 大明定文武官俸正一品月支米八
十七石從一品月支米七十四石正二品月支米
六十一石從二品月支米四十八石正三品月支
米三十五石從三品月支米二十六石正四品月
支米二十四石從四品月支米二十一石正五品
月支米十六石從五品月支米十四石正六品月

支米十石從六品月支米八石正七品月支米七石五斗從七品月支米七石正八品月支米六石五斗從八品月支米六石正九品月支米五石五斗從九品月支米五石俱米鈔兼支未入流月支米三石

吏員俸米

筆談曰天下吏人素無常祿惟以受贓

爲生熙寧三年始制天下吏祿而設重法以絕請託國朝五府提控六部都察院都吏布政司通吏月支二石五斗五府掾吏六部都察院通政司太常光祿太僕寺應天府布政司都司衛各

令史大理寺胥吏國子監鴻臚寺府庫局司牧局
顏料局各府各司吏都察院太醫院各典吏按察
司鹽運司各書吏月支二石五府六部大理光祿
太僕寺國子監應天順天府布政按察監運都司
衛各典吏十三道巡按各書吏翰林院光祿寺各
署欽天監司曆太常祠祭署織染皮作鑄印惠民
雜造鞍轡軍器抄紙印鈔寶源局內府庫石灰閔
各牧監會同館寶鈔監課龍江提舉司典牧營膳
孳牧孳牲紀善典膳奉祀典寶審理工正良醫典
儀理問千戶所五城兵馬布政按察監運斷事衛

鎮撫長史司州縣各司吏月支一石俱米鈔兼支
宗人府 即古宗正卿周官也周受命封建宗盟始
選其宗中之長而董正之謂之宗正秦漢因之或
更宗伯或改秩宗皆置官以序九族 國初置大
宗正院洪武二十二年改院爲府設宗人令左右
宗正左右宗人俱正一品首領官經歷司經歷正
五品職專玉牒譜系之事初以 親王領府事後
但以勲戚大臣掌之而不備官

內閣 伊尹爲太保武王立太師太傅太保爲三公
論道經邦堯時舜爲太尉舜時契爲司徒禹爲司

空亦爲三公之職漢崇之爲上公黃帝得六相成
湯置二相周官未有相名也秦悼武二年始制左
右丞相漢因之魏改司徒後周制內史唐改三省
中書令侍中尚書令宋神宗制尚書左右僕射兼
門下中書侍郎其後改爲左右丞相 國初革去
以防專制有建議者處以重辟

聖祖之意遠矣瑣綴錄云 國初不設宰相永樂初
乃設內閣選翰林六七臣居之職知制誥日備顧
對叅決政機隱然相職而官不過學士洪熙初始
陞孤卿皆潛邸舊人

六部 國初因元制置中書省設左右丞相等官天下政事皆由之而出其屬有四部分治錢穀禮儀刑名營造之務洪武元年始定吏戶禮兵刑工六部俱正三品衙門仍屬中書省十三年中書省革陞六部尚書爲正二品左右侍郎二員正三品首領官司務廳司務從九品屬官郎中一員正五品員外郎一員從五品主事正六品按秦少府遣吏四人在殿中主蒺書謂之尚書漢光武始分尚書爲六曹秦以郎爲內侍故曰侍郎隋煬帝于六曹各置侍郎一人秦以郎侍衛居中故曰郎中隋文

帝于尚書二十四司各置員外郎一人謂本員之外復置郎也後魏于尚書諸司置主事令史隋煬帝但曰主事皆吏長之名也

吏部 漢成帝置常侍曹光武改爲吏部今尚書即周天官卿也侍郎即周少宰也所屬有四清吏司曰文選因隋選部今掌天下文吏班秩品命曰驗封因唐司封今掌邦之封爵曰稽勲因周司勲今掌邦國官人之勲級曰考功因魏今掌文職官吏考課

戶部 吳有戶部今尚書即周地官卿也侍郎即周

小司徒也首領官照磨所照磨一員正八品檢校
一員正九品所屬隋曰民部魏曰度支金部倉部
今改爲浙江江西湖廣陝西廣東廣西山東山西
福建河南四川雲南貴州十三清吏司各掌一布
政司戶口錢糧仍量繁簡帶管直隸州縣每司內
分民度金倉四科以領其事

太倉 秦漢大司農屬官有太倉令丞唐玄宗以監
察御史充太倉出納使梁改曰如京使取詩如坻
如京之義今屬戶部郎中員外郎主之

戶部所屬 寶鈔提舉司提舉一員正八品寶鈔

惠庫收各處解到鈔錢廣積收紵絲綾羅硝磺等物贓罰庫收籍沒官民家財追沒官吏贓物并錢鈔紵絲綾羅絢絹氈氍毹鐵皮綿布衣服花絨等物甲字庫收布疋顏料乙字庫收紵絲綿布胖襖袴鞋毛襖等物丙字庫收綿花絲綿等物丁字庫收銅鐵皮張蘇木等物戊字庫收軍器胡椒等物各大使正九品各副使從九品廣盈庫收紵絲紗羅綾綿絢絹布疋等物御馬倉南京龍江鹽倉檢校批驗所張家灣檢校批驗所抄紙局印鈔局長安門東西北安門倉各大使副使俱未入流

禮部 漢成帝置客曹隋爲禮部今尚書即周春官
大宗伯卿也侍郎即周小宗伯也所屬有四清吏
司曰儀制因魏儀曹今掌舉貢儀制而辯其名數
曰祠祭因晉祠部今掌祭享天文漏刻國忌廟諱
卜筮醫藥道佛之事曰主客因周官今掌諸蕃朝
貢等事曰精膳因北齊膳部今掌邦國牲豆酒膳
辯其品數

禮部所屬 鑄印局大使一員副使一員俱未入流
教坊司唐高祖置內教坊武后改爲雲韶府以中
官爲使宋以伶人久次者爲之今設奉鑾一員正

九品左右韶舞左右司樂各二員俱從九品僧錄
司左右善世正六品左右闡教從六品左右講經
正八品左右覺義從八品道錄司左右正一正六
品左右演法從六品左右至靈正八品左右玄義
從八品

兵部 魏置五兵隋爲兵部今尚書即周夏官大司
馬卿也侍郎即小司馬也所屬有四清吏司曰武
選因魏五部郎曹今掌天下武職班秩品命職方
因周官今掌天下地圖及城隍鎮戍烽堠之政曰
車駕因魏駕部今掌邦國輦車及天傳驛廐牧曰

武庫因御庫部今掌邦國戎器儀仗辯其出入之數

兵部所屬 會同館大使一員正九品副使二員從九品南京典牧所提領一員正八品大通關大使一員副使一員京衛武學訓導俱未入流武學教授從九品

刑部 宋置都官隋爲刑部今尚書即周秋官大司寇卿也侍郎即周小司寇也照磨檢校品與戶同司獄司司獄六員從九品古屬有四曰憲部比部司門部都官部今改爲浙江等十三清吏司各掌

一布政司刑名仍量繁簡帶管直隸州縣并在京衙門每司分憲比司門都官四科以領其事

工部 晉有起部隋爲工部今尚書即周冬官大司空卿也侍郎即周小司空也所屬有四清吏司曰營繕今掌經營興造衆務曰虞衡因周禮虞衡之官今掌天下山澤而辨其時禁曰都水因隋水部今掌天下陂池川瀆政令曰屯田因晉今掌天下屯種政令

工部所屬 營繕所所正正七品所副正八品所丞正九品文思院唐有文思院宋始掌工巧之事以

時文思索故工作之所號之織染局皮作局軍器局鞍轡局寶源局大使俱正九品副使俱從九品大通關提舉龍江關提舉俱正八品蘆溝橋通州廣積通積抽分竹木局節慎庫各大使柴炭司大使俱從九品副使未入流

按周以太師傅保爲三公以大司馬司徒司空司寇冢宰宗伯爲六卿漢有尚書令以尚書爲中臺謁者爲外臺御史爲憲臺謂之三臺魏晉宋隋並曰尚書臺尚書秦置也主發書也梁陳後魏北齊隋曰尚書省唐龍朔更名中臺光宅更名文昌臺

又東漢與司隸校尉御史中丞皆專席坐京師號曰三獨坐又秦有尚書僕射僕主也古者重武故官曹之長主領其屬而習於射事也唐龍朔改左右匡政開元改左右丞相又有諸曹尚書光武分爲六曹并一令一僕射謂之八座魏有五曹與二僕射一令謂之八座又有尚書左右丞丞承也言承助令僕總理臺事尚書令與左丞總領紀綱僕射與右丞掌稟假財穀魏晉以來左丞得彈奏八座唐龍朔改爲左右肅務其屬官有三署

主官中郎將左

右中郎將並初學記

都察院

周官有御史秦有御史大夫

侍御之率漢故曰大夫

御史臺有中丞以其別在殿中掌蘭臺秘書外督

部刺史內領侍御史北齊後周不置大夫而以中

丞爲臺主漢因秦制掌副丞相九卿高第者拜之

成帝改大司空龍朔改大司憲又有兩丞其一曰

御史丞唐分爲左右臺大夫漢武帝始有侍御史

魏文帝始遣御史居殿中隋文帝始有監察御史

宋爲御史臺其屬有三院一曰臺院知雜御史爲

侍御史隸焉二曰殿院言事官爲殿中侍御史隸

焉三曰察院六察官爲監察御史隸焉 國初置

御史臺後改爲都察院設左右都御史正二品左

右副都御史正三品左右僉都御史正四品職專

糾劾百司辯明冤枉提督各道及一應不公不法

事首領官經歷正六品都司正七品照磨檢校各

一員司務二員司獄六員品同戶刑其屬浙江等

十三道監察御史正七品凡遇刑名各照道分送

問發落按周官但掌天下所御之書故曰御史至秦漢爲糾察之任時或監郡督察

差委 國朝宣德二年差御史各處清軍天順二年

奏准三年更替正統元年差御史提督南北直隸

學校三年差御史巡視監課十三年差御史巡視

京城成化三年差御史于陝西巡茶一年更代後
有巡關巡監巡河捕盜盤糧前此洪武六年令御
史察舉各處官員永樂元年命巡按御史察其廉
貪宣德十年令行考察正統四年奏定憲體及出
巡禮儀凡差委御史出巡追問審理刷卷等事都
御史具事目請 旨點差

繡衣 史記武帝時群盜起使范昆張德等衣繡衣
持節虎符發兵以擊之繡衣使自此始又裏行謂
得裏面行也裏面者皇城大內裏面也

巡撫 永樂間遣尚書侍郎少卿等官鎮守景泰間

因與巡按不相統屬難以行事定爲都御史巡撫兼軍務者加總督贊理掌糧餉者加總督兼理他如整飭邊備提督邊關及撫治流民等項皆隨事異名若邊境有事又有總督提督總制叅贊贊理及經畧巡視之名近例尚書侍郎治事于外者兼都御史以便行事今有加宮保者

通政使司 唐虞納言官也洪武三年初置察言司設司令掌受四方章奏尋革十年始制通政使司正三品衙門通政使正三品左右通政正四品左右叅議正五品職專出納帝命通達下情關防諸

可出入公文奏報四方臣民實封建言陳情伸訴
及軍情聲息災異等事首領官經歷正七品知事
正八品

大理寺 黃帝立后土辯乎北方故爲李理官也舜
命臯陶作士士理官也秦置廷尉漢因之景帝復
爲大理取天官貴人之牢曰大理之義梁爲秋卿
後魏置少卿晉置丞唐因之今卿正三品左右少
卿正四品左右寺丞正五品首領官司務從九品
其屬左右二寺左右寺正正六品即秦廷尉正也
左右寺副從六品左右評事正七品因隋官也

專密錄天下刑名凡刑部都察院司道罪有出入者依律照駁事有冤枉者推情辯明

太常寺

周禮春官職也秦曰奉常王者旌旗盡日

月大事則建以行禮官主奉持之漢改曰太常尊大之義也後漢有卿隋有少卿秦有丞今卿正三品少卿正四品寺丞正六品職專祭祀之事首領典簿正七品因漢官也屬官博士正七品因秦官也協律郎正八品因後魏也贊禮郎正九品因漢治禮郎也司樂從九品神樂觀提點正六品知觀從八品犧牲所吏目從九品隋有郊社令漢文帝

有籍田令唐有陵臺令今天地壇山川壇籍田孝
陵長陵憲陵景陵裕陵茂陵各祠祭署奉祀各一
員俱從七品祠丞各一員俱從八品

鴻臚寺

周官大行人秦爲典客漢改曰鴻臚鴻臚聲

臚傳之也傳聲贊道也隋有丞唐有主簿今卿正
四品左右少卿從五品左右寺丞從六品首領主
簿從八品屬官司儀署司賓署署丞正九品鳴贊
序班俱從九品職專朝儀宣贊等事

光祿寺

漢有光祿勳梁改光祿卿今卿從三品少

卿正五品寺丞從六品職專膳羞宴享等事首領

典簿從七品錄事從八品屬官大官珍羞良醞掌
醢四署署正俱從六品署丞俱從七品監事俱從
八品司牲司司牧局大使俱從九品副使俱未入
流

太僕寺 洪武初置太僕寺在滁州置北平遼東陝
西甘肅為行太僕寺永樂間改北平稱太僕寺正
統間定滁州為南京太僕寺按周官有太僕秦漢
有丞梁有主簿今卿從三品少卿正四品寺丞正
六品職專牧馬之事首領主簿從七品常盈庫大
使未入流行太僕寺官品同

尚寶司

漢有符節令位次中丞領上符璽唐武后

改爲符寶郎今卿正五品少卿從五品司丞正六品職專寶璽符牌等事

國子監

國子周制也晉武帝初立國子學隋煬帝

改爲監凡官名祭酒皆一位之元長古者得主人饌則老者一人舉酒以祭地故以祭酒爲稱周封兄弟同姓成王時彤伯爲祭酒主親屬秦漢因之晉武帝始制國子祭酒國子博士助教隋煬帝置司業取樂正司業之義主置監丞北齊置主簿今祭酒從四品司業正六品繩愆廳監丞正八品博士

士廳五經博士典簿廳典簿俱從八品典籍廳與
籍從九品掌饌廳掌饌未入流率性脩誠心正義
崇志廣業六堂助教俱從八品學正九品學錄從
九品職專教化之事

翰林院 學士之稱始自漢晉而命官起于宋齊唐
明皇始置翰林院改供奉爲學士禁中亦有侍講
侍讀學士至宋真宗始置二職于翰林明皇始置
史館脩撰編脩今學士正五品侍講侍讀學士從
五品首領官孔目未入流屬官侍講侍讀正六品
五經博士正八品典籍從八品侍書正九品侍詔

從九品史官脩撰從六品編脩正七品檢討從七
品職專制誥史冊文翰等事庶吉士永樂間選二
甲三甲中進士為庶吉士隸本院命學士教之學
業成者二甲除編脩三甲除檢討餘除科道部屬
翰林陞用 雙溪雜記云自來陞用六部堂上官不
拘出身何衙門初無內閣禮部必用翰林出身人
之例成化弘治以來吏部必用翰林一人禮部非
翰林出身者不得陞用由是翰林人多陟顯要矣
太學士 學士無太稱唐中宗欲以崇寵大臣乃有
太學士之名唐至五代有文明殿太學士為宰相

兼職宋真宗寵王欽若罷政特置資政殿學士班
在翰林上今設華蓋殿武英殿文華殿文淵閣東
閣大學士俱正五品班在本院學士上永樂初簡
命編脩等官於文淵閣參預機務謂之內閣漸陞
至學士等官洪熙元年以輔導任重加陞至師保
及各部尚書侍郎職銜仍兼學士大學士又添設
謹身殿太學士以後或由他官入閣辦事者皆兼
學士太學士唐末有閣門使今閣門使正六品武
英殿承天門右順門待詔從九品

殿閣詞林記序 曰夫詞林奚始也周官太史掌六

典以辯法內史掌八柄以詔治凡學士子及學士
必時上下交脩內外交養所以爲國本計者重且
大也漢置太史令凡供奉承明待詔金馬者胥麗
焉唐設學士兼講讀弘文闕館麗正創院集賢揮
翰延英召對厥儀始備至宋則彬彬然盛矣祥符
則建龍圖閣天禧則建天章閣嘉祐則建寶文閣
元符則建顯謨閣大觀則建徽猷閣紹興則建敷
文閣淳熙則建煥章閣慶元則建華文閣嘉泰則
建寶謨閣寶慶則建寶章閣咸設學士以典

宸章代王言可不謂重且大乎我高皇帝法周

建官倣宋建閣初創翰林院以陶安宋濂爲學士
建華蓋諸殿以劉仲質全恩誠爲太學士又增設
弘文館學士以劉基等爲之左右春坊太學士以
董倫等爲之肆我 成祖開文淵閣以解縉胡廣
楊士奇等七人預機務 仁宗復弘文館以楊溥
陳繼王璉等五人備顧問纂修 實錄即右史紀
動也表章 寶訓即左史紀言也撰擬制誥演潤
絲綸掄材秘省校藝禮園即太史掌典內史掌柄
也上而啟沃 經筵贊襄 聖神夾輔 諸宮弼
亮 元良其所繫者至重且大非諸司儼也凡遇

御殿慶成則令列坐于殿上 御門視朝則令侍
立於金牀是故太學士學士之官尤重且大焉我
世皇紹帝王鴻烈光 祖宗舊制肇 御無逸殿則
命太學士坐講錫宴幽風亭則命學士坐享陪祀
土穀壇則命學士分直 臨幸太學則命學士侍
坐聽講明禋 園丘則命學士輪班視牲捧 勅
天門則親承 玉音起草禁籞則密覲 龍顏晉
錫駢蕃 宸慈豐渥誠百王所未有千載所罕遇
也

禮記卷之二十一終

禮識畧八卷

崇陽吳楚材國賢編

謝所教受仲校

職官部下

詹事府 秦官漢因之掌太子家唐始置少詹事一人以貳詹事正三品少詹事正四品府丞正六品首領主簿正七品錄事從九品屬官通事舍人按漢司隸 有功曹從事史兼錄衆事東晉有通事舍人

左右春坊 周太子官有庶子唐始置太子諭德中允贊善漢丞相府置司直今左右庶子俱正五品

左右諭德從五品左右中允正六品左右贊善古左右司直郎俱從六品左右清紀郎從八品左右司諫從九品

司諫局 國語曰勾踐爲夫差洗馬如淳曰前驅也荀子天子乘大輅諸侯持輪乘輿先馬注先馬導馬也後世太子洗馬洗先也言天子出則有先驅太子則有洗馬言騎而爲太子儀衛之先也晉太子詹事屬官有洗馬八人掌太子圖籍經書漢蘭臺東觀藏書有校書之職後以郎居其任故謂校書郎元魏始命爲官齊集書省有正書官北齊始

為正字今洗馬從五品校書正九品正字從九品

凡本府官皆以東宮輔導侍從為職

西京雜記皇太子官稱家

臣動則稱從

中書科

秦始皇置中書謁者漢元帝去謁者字魏文

帝改秘書省為中書省令為中書令置通事郎後改為中書侍郎隋文帝中書令與侍中知政事為宰相舍人本周官掌平宮中之政晉初置中書舍人國初中書省設置省舍人後革省為科定書舍人從七品職專書寫誥勅冊等事

六科

古諫官秦有諫大夫後漢有諫議大夫唐分

為左右武后置左右補闕拾遺宋太宗改為左右
司諫正言秦漢別有給事黃門之職後漢有給事
黃門侍郎左右給事中以有事殿中故曰給事中
今設吏戶禮兵刑工六科為諫官每科都給事中
正七品左右給事中俱從七品職專參駁糾劾等
事

六科廊 國朝六科本與尚寶司相鄰今工部委官
製衣處猶稱六科廊是也永樂間失火遷出午門
外今遂為定居

近侍 菽園雜記云翰林院尚寶司六科官在前常

朝儀在奉天門上御座左右侍立故云近侍今在
門下御道左右云是太宗晚年有疾女官扶持上
下因退避居下遂爲定位

行人司 周官有行人今設司正正七品左右司副
從七品行人正八品職專冊封葬祭宗室及出使
外夷等事

太醫院 周有醫師上士下士秦漢少府屬有大醫
令丞元置太醫院有使副判各一員今設院使正
五品院判正六品首領吏目從七品屬官御醫正
八品職專診視疾病脩合藥餌等事所屬惠民藥

局生藥庫大使副使俱未入流

欽天監 少昊鳳鳥氏爲曆正夏曰大使周禮春官
有保章氏夏官有挈壺氏唐改司天監唐有少監
宋置大使正唐有五官正靈臺郎今設監正正五
品監副正六品首領主簿正八品屬官春夏中秋
冬官正正六品五官靈臺郎從六品五官保章正
正八品五官挈壺正從八品五官監候五官司曆
俱正九品五官司晨漏刻博士俱從九品職專曆
數天文地理之事

上林苑監 漢武帝始起上林苑隋置宮苑總監

置宮苑使 國朝永樂五年置左右監正正五品

左右監副正六品左右監丞正七品首領典簿正

九品蕃育嘉蔬良牧林衍四署典署正七品署丞

正八品錄事正九品職專苑園蕃牧種植等事

五城兵馬指揮司 宋以四廂都指揮使巡警京城

神宗置勾當左右廂公事民間謂之都廂今指揮

正六品副指揮正七品首領吏目未入流職專京

城巡捕等事

京府 周成王命君陳尹東郊漢武帝更右內史爲

京兆尹秦置郡丞漢設治中一人居中治事主衆

曹文唐宋太祖諸州置通判唐節度等使皆有推
官唐高祖有檢校梁州諸軍事今南京應天府北
京順天府府尹正三品府丞正四品治中正五品
通判正六品推官從六品首領經歷從七品知事
從八品照磨從九品檢校未入流司獄從九品

所屬衙門

隋有州博士唐德宗改為文學宋神宗

于諸大郡府始置教授一人掌教導諸生今儒學
教授一員從九品訓導六員未入流都稅司宣課
司各門稅課司織染局草場大使俱從九品副使
俱未入流各門分司副使倉通運所金銀場鐵冶

批驗所大使副使俱未入流

京縣 南京上元江寧二縣北京大興宛平二縣知
縣正六品縣丞正七品主簿正八品典史未入流
五府 晉為都督諸軍事 國初置統軍大元帥府
改樞密院又改為大都督府洪武十三年始分中
左右前後軍都督府設左右都督正一品都督同
知從一品都督僉事正二品首領用文職經歷從
五品都事正七品各府分管在京在外衛所職專
軍旅之事初以公侯伯為之後或掌府事都督僉
書軍政所屬都司二十一處留守司一處內外衛

四百九十一處守禦屯田群牧千戶所三百一十一處儀衛司三十三處宣慰司二處招討使司一處宣撫司六處安撫司十六處長官司七十處番夷都司衛所等四百七處

禁衛

周有虎賁氏漢京師有南北軍掌理禁衛又

有羽林郎武帝更秦中尉為執金吾唐置神策神武等軍五代後唐有侍衛親軍禁軍號控鶴年多者號寬衣控鶴宋改為天武今在京親軍不屬府者惟錦衣衛旗手衛府軍衛府軍左右前後四衛金吾左右前後四衛羽林左右前三衛燕山左右

前三衛虎賁左衛大興左衛濟陽濟川通州三衛
共二十二衛後又設騰驤左右武驤左右四衛亦
係親軍并武功中左右永清左右彭城長陵景陵
獻陵裕陵茂陵衛俱不屬府

錦衣衛

唐置營幕使宋置儀鑾使

國初置儀鑾

司後罷司置衛統軍同諸衛而所隸又有將軍力士校尉人等職掌直駕侍衛巡捕等事其任遇漸加視諸衛獨異首領鎮撫司問理本衛刑名成化十四年始增鑄印信各為一司經歷用文職掌本衛文移出入所屬錦衣中左右前後五所又分鑾

輿擎蓋扇手旌節旛幢班劔斧鉞戈戟弓矢馴馬
十司統領校尉掌鹵簿儀仗及直駕擎人直宿等
事上中左右前後中後親軍七所分管力士軍匠
又馴象所領本衛軍奴養象以備朝會陳列及駕
輦馱寶之用

旗手衛 國初置旗手千戶所後陞為衛掌大駕金
鼓旗纛統領隨駕力士及宿衛等事

京衛武學 宋神宗始就武成王廟側建武學如太
學儀 國朝京師建武學諸養京衛幼官與子弟
未襲職者設教授一員從九品訓導六員未入流

南京文武衙門 南京在洪武間為京師自永樂定都于北因名南京文武官並置在南京者與北京同但加南京二字

南京衙門牌扁 瓊綴錄云南京文武各衙門俱有牌扁直書衙門之名惟翰林院三字橫列而兵部獨無相傳洪武間一夕潛有掣去之者詰旦具聞上不之省蓋以示去兵之意至今不敢復揭

十三省承宣布政使司 唐有叅知政事宋下宰相一等元尚書省亦置為宰相之貳行省亦有左右叅政唐高祖有檢校隋改都令史為都事今左右

布政使從二品左右叅政從三品左右叅議從四
品首領經歷司經歷從六品都事從七品照磨所
照磨從八品檢校正九品理問所理問從六品副
理問從七品提控案牘未入流各省所屬庫雜造
織染局大使副使陝西四川茶馬司洪武初令陝
西洮州河州西寧各設茶馬司收貯官茶每三年
一次差在京官選調邊軍齎捧金牌符往附近番
簇將運去茶馬給與邊軍騎操大使正九品副使
從九品廣西裕民司雲南滇池魚課司大使副使
俱未入流

各府

秦罷侯置守漢景帝更名太守王莽改曰大

尹唐武德罷郡置州改太守為刺史今知府一員

正四品同知正五品通判正六品添設無定員推

官一員正七品首領經歷正八品知事正九品照

磨從九品檢校未入流所屬司獄司司獄從九品

儒學教授一員從九品訓導四員未入流陰陽學

正術醫學正科僧綱司都綱道紀司都紀俱從九

品副都綱副都紀俱未入流稅課司分司倉庫局

雜造織染局大使俱從九品副使及茶鹽批驗守

茶倉魚課司金銀場局鐵冶所大使副使俱未入

流府州縣巡檢司巡檢從九品水馬驛丞通運所
大使河泊所官閘官灞官俱未入流

黃堂 演繁露云郡國志雞坡之側即春申君之子
假居之地後有守居之以數失火故塗以雄黃遂
名黃堂又宋參知政事出權外府自乾德中呂餘
慶知成都始

各州 唐代宗勅刺史有故及闕但令上左依次知
州事隋使府判官為諸使官屬五代始領郡事為
州府職今知州一員從五品同知從六品判官從
七品添設無定員若不及三十里長有屬縣者裁

減同知無屬縣者裁減同知判官首領吏目一員
從九品所屬儒學學正一員訓導二員陰陽學典
術醫學典科僧正司僧正道正司道正州縣倉稅
課局茶課司大使副使俱未入流

五馬 太守五馬莫知的據惟見于古樂府五馬立
踟躕其來已久漢太守比州長法御五馬老杜亦
云使君五馬一馬總

各縣 周置四百里為縣官有縣正晉謂之大夫魯
衛謂之宰楚謂之令尹唐大中年裴讓權知縣事
宋以朝官知縣秦置令丞後漢有郡主簿曰督郵

隋諸縣始置堂勾稽簿籍今知縣正七品縣丞正八品主簿正九品添設無定員若不及二十里長裁革縣丞主簿首領典史一員未入流所屬儒學教諭一員訓導二員陰陽學訓術醫學訓科僧會司僧會道會司道會俱未入流

十三省提刑按察司 唐置十道按察使宋轉運使兼按察使元各道置提刑按察使有副使僉書公事為之貳又置經歷知事等員後改肅政廉訪司今按察使一員正三品副使正四品僉事正五品添設無定員首領經歷正七品知事正八品照磨

正九品檢校從九品司獄司司獄從九品

都轉運鹽使司

唐置江淮處置轉運使後置諸道

鹽鐵轉運使多以重臣兼領五代置轉運司唐明
皇以崔希逸為轉運副宋京師置都鹽院太祖以
許允言為判官今兩浙兩淮福建山東長蘆河東
鹽運司運使從三品同知從四品判官從六品首
領經歷從七品知事從八品所屬儒學教授從九
品訓導未入流批驗鹽引所鹽課司分司倉庫大
使副使俱未入流

鹽課提舉司

宋熙寧有大都大提舉茶馬事紹興

陽春園 材年

復置提舉茶鹽司元置都提舉同提舉副提舉等

員今廣東陝西四川雲南鹽課司提舉從五品同

提舉從六品副提舉從七品首領吏目從九品

苑馬寺 今卿從三品少卿正四品寺丞正六品首

領主簿從七品所屬各監監正正七品監副正八

品錄事未入流苑圍長從九品

衍聖公 宣聖襲封衍聖公孔氏子孫正二品司樂

管勾典籍俱未入流孔顏孟三氏教授從九品學

錄未入流

王府長史司 秦置郡丞以佐守在邊為長史掌兵

馬令 王府左右長史正五品首領典簿正九品
所屬審理所審理正正六品審理副正七品紀善
所紀善正八品典寶所典寶正正八品典寶副從
八品典膳所後漢有太子食官隋改為典膳正今
王府因之典膳正正八品典膳副從八品奉祀所
奉祀正正八品奉祀副從八品典樂正九品良醫
所良醫正正八品良醫副從八品工正所工正正
八品工副從八品典儀所元有太子典儀今王府
因之典儀正正九品典儀副伴讀教授俱從九品
引禮舍人倉庫大使副使俱未入流 郡王府典

膳正八品教授從九品

中都留守司 唐明皇太原置尹以為留守謂之三
都留守蓋車駕不在京則置留守今留守正二品
副留守正三品首領經歷司經歷正六品都事正
七品

各都指揮使司 唐兵志曰僖宗幸蜀以神策大將
軍為都指揮使今都指揮使正二品都指揮同知
從二品都指揮僉事正三品首領經歷司經歷正
六品都事正七品司獄司司獄從九品斷事司斷
事正六品副斷事正七品吏目未入流庫大使從

九品副使草場大使倉副使俱未入流

各衛 漢武初置衛將軍今一衛隸軍五千六百名
指揮使正三品指揮同知從三品指揮僉事正四
品衛鎮撫從六品首領經歷司經歷從七品知事
正九品所屬千戶所隸軍一千一百二十名正千
戶正五品副千戶從五品百戶所隸軍一百一十
名百戶正六品每所設總旗一名小旗十名已上
武官俱世襲惟首領屬官選除

衛學 國朝軍衛無學宣德十年從兵部尚書徐河
之請令天下軍衛獨治一城者皆立學正統以來

天下軍衛延至邊徼建學設教授訓導品秩俸祿如府學之制

鎮戍 唐制緣邊戎寇之地則加以旌節謂之節度使武德初邊要之地亦置總管以統軍 國朝凡天下要害處所專設官統兵鎮戍總鎮一方者曰鎮守獨守一路者曰分守獨守一城一堡者曰守備有與主將同處一城者曰協守又有備倭提督提調巡視等名其官稱掛印專制者曰總兵次曰副總兵曰叅將遊擊將軍俱於于公侯伯都督都指揮等官內推舉克任

土官宣慰使司 唐以藩方不靖遣重臣宣諭慰安
之故有宣慰使之名今宣慰使從三品同知正四
品副使從四品僉事正五品首領經歷司經歷從
七品都事正八品儒學教授從九品訓導未入流
宣撫司學同

宣撫使司 唐有宣撫使宋不常置有軍旅大事則
命執政大臣為之今宣撫從四品同知從五品副
使從五品僉事正六品首領經歷司經歷從八品
知事正九品

招討使司 唐有招討使用兵權置後以節度使兼

之元有招討使副招討今招討從五品招討副正六品首領吏目從九品經歷從七品

安撫司 隋有安撫大使唐以節度使兼之德宗置副使今安撫五品同知正六品副使從六品餘事正七品首領吏目從九品

長官司 長官正六品副長官從六品吏目教諭訓導俱未入流

蠻夷長官司 長官正七品副長官從七品已上土官俱世襲惟首領屬官選

吏員 文獻通考曰西漢開儒吏二途以取人未為

抑揚輕重自後判為二途儒詆吏為俗吏諂儒為
迂故拘謫不通者一歸之儒放蕩無耻者一歸之
吏而二途皆不足以得人矣會典云 國初因前
代之制令有司設司吏許各保貼書二名其後定
設掾史令史書吏司吏典吏俱視政事繁簡為額
及政事益繁又設提控都吏人吏胥吏獄典攢典
事減者則裁之

六房 唐張說為相改政事堂號中書門下列五房
于後一曰吏房二曰樞機三曰兵房四曰戶房五
曰刑禮旁分以曹官主衆務焉 國朝各衙門一

吏戶禮兵刑工六房吏典書辦文移

世稱卿胥為書手按宋衙

應明經舉元和初至河陰疾發廢業為益鐵院書手

吏員出身品級

通典曰令史漢官也晉中書有主

書之負齊為主書令史後魏于尚書諸司置主事

令史又尚書有都令史宋太祖知堂吏檀中書事

權多為奸賊故選授用士人神宗行官制除堂後

官之名于門下省中書省置錄事而已 國朝一

品二品衙門提控都吏通吏出身從七品一品二

品衙門掾史令史典吏出身正八品內府門吏出

身正八品三品衙門令史胥吏書吏出身從八品

三品衙門典吏四品衙門令史出身正九品四品衙門典吏五品衙門司吏典吏巡按書吏各道書吏出身從九品六品七品八品九品并雜職衙門吏典都察院各道典吏俱出身雜職

卮言云尚書令本執政官至隋而重大業初僅楊素一人武德中冊拜太宗後絕不復設代宗朝加郭子儀固辭不敢當後邠寧帥王行瑜欲得之以子儀例不予加尚父太師錫鐵券然自是行瑜及李茂貞錢鏐王鎔馬殷高季興錢元瓘錢俶得為之皆藩鎮也楚王元佐鎮王元偓周王元儼皆宗

室也大臣贈者以無兼官為重若趙韓王韓魏王是也天策上將亦唐高特設以褒太宗者後加楚王馬殷馬希範皆開府如故事宋真宗加楚王元則虛稱也如周王元儼輩用以贈官北齊有贈假黃鉞至宋贈入朝不趨劍履上殿尤無謂古

官名有極賤而極貴者僕射有極貴而極賤者太

師樂官以文名武者漢昭文將軍儒林校尉以武

名文者唐有武學博士今名有俗而官則雅者庶

子洗馬名有武而官則文者兵馬指揮名有文而

官則武者留守大而小者大使小而大者副使名

與實不相蒙者祭酒古貴而今賤者宣撫招討巡

檢古賤而今貴者侍郎

漢趙后通

古今官名有

非人臣所宜稱者總百揆

舜禹以後司馬昭奕桓玄劉裕蕭道成蕭衍高

洋陳霸先楊堅李淵朱全忠俱為之蓋即真之漸也

宰衡

漢王莽晉天柱大

將軍

魏爾朱崇後加爾朱兆高歡皆辭

太上秦公

魏胡無上王魏

帝兄邵

宇宙大將軍都督六合諸軍事

梁侯景

天地太

師成范長生

尚父

周太公望漢董卓唐郭子儀李輔國王行瑜五代錢鏐

回天再

造功臣

朱全忠

皇天之下

元帝

安國相王

睿鎮國大長公主

睿宗妹太平公主

相國丞相皆秦官

秉政者太師太傅太保古三公後以為三師位上

公以太尉司徒司空為三公故也相國自呂不韋
蕭曹後罷不設置司馬昭父子以此篡魏後遂因
之東漢有三公而無丞相曹操父子以此篡漢亦
遂少置渡江之後惟王導會稽王昱以序遷者三
師惟太師為尊魏避司馬師諱改為太宰高齊並
置而以太宰位太師上左右丞相位太宰上然董
卓以相國遷太師孔光以丞相宇文泰以大丞相
遷太師大家則以太師為尊也元帥即漢太尉
晉都督中外諸軍職也金為都元帥權甚重而位
在三公丞相下元則至輕僅若今之指揮使耳至

加以天下為稱則亦非人臣所宜當也 相國魏

司馬昭司馬奕晉司馬倫桓玄劉裕宋蕭道成齊

蕭衍梁侯景陳霸先偽漢劉粲劉曜偽趙石虎石

琨魏高洋後周楊堅唐朱全忠皆不久而成禪代

者也 大丞相魏爾朱榮高歡宇文泰後周楊堅

隋李淵契丹趙延壽韓德元伯顏 天下兵馬元

帥唐肅宗代宗德宗皆以皇太子領之朱全忠以

梁王領之肅宗為大元帥五代時錢鏐錢俶以吳

越王領都元帥北魏初加爾朱榮柱國大將軍位

承相上後遂加天柱若微稱然宇文泰在西魏與

七功臣為八柱國加者漸多至隋乃以上柱國為崇加而柱國次之唐時上柱國品遂下至第四

明興始復正之以上柱國為正一品勲柱國為從一品勲漢列侯不與政而勲重者位特進後以大將軍鄧騭辭位加同三司之儀以後得開府辟僚屬又與三公俱開黃閣故曰開府儀同三司羊征南位開府謙讓不宥辟召是也魏晉之際太保王祥以睢陵公太保衛瓘以蘭陵公司徒魏舒以劇陽子老就第太保同保傅司徒同三司亦此意但不入官耳晉宋齊梁陳俱不輕受北魏爾朱世

隆辭太保如同三師在三公上後周及隋改為勳
官在柱國下有三等曰上開府曰開府曰儀同至
唐而始復故文皇之世唯尉遲敬德辭都督乃得
加之位次房司空以後復為階官之最其次特進
國初亦因之然官至太尉司徒司空而曰儀同三
司名實抑何舛也國初去開府儀同以特進光祿
大夫冠正一品是矣然以公卿而稱大夫如尚書
再滿考階曰資德大夫勳曰正治上卿其勳階亦
自相矛盾不可不改正也予嘗戲謂官至卿而稱
大夫者尚書左右都御史也官止大夫而得稱卿

者太常至尚寶也

左傳趙簡子伐衛誓師曰克

敵者上大夫受縣下大夫受郡杜氏註曰千里百

縣縣有四郡當是時縣盡統郡也按堯分天下為

九州舜益以十二州禹復為九州其所統者五等

之國諸侯兼并地日益以大而始有郡縣之名秦

孝公命商鞅分秦地為四十一縣後并天下罷侯

置守凡三十六郡而郡始改而統縣矣漢氏因之

而兼有王國侯國武始復以十三州統郡國後設

刺史權尊而秩卑若今之巡按御史至後魏末刺

史握兵益重遂為州牧三國晉氏往往復設將軍

而州有不領郡者郡亦有不屬州者隋煬帝悉改
州為郡諸邑屬焉其大抵因秦之舊唐復以郡為
州而開元天寶之際又以兵興設節度使統之其
不建節者為觀察而亦有畿內如同華江左如蘓
常不屬藩鎮者宋興藩鎮為虛銜而實則以州領
縣其得稱為府者或以建立行都如魏州興唐或
以天子藩封建節如宋州歸德府之類蓋小則為
州為軍大則為府自故相以及曹郎皆得次第任
之重者判輕者知而南渡之後又設招討制置安
撫以彈壓之上而宣撫尚得兼領州府蓋又隱然

唐舊矣元始以府領州縣府之大者為路縣之大者為州而州又有領縣者又為行省以分轄之軍事無屬焉兵興之際或設行樞密院事定則否大省則有行御史臺小者有肅政廉訪使 國朝因之罷路悉為府後降行省為布政司行樞密院為都指揮使司行臺廉訪總名之曰按察司以網維郡縣後以遠不相及復設守巡兵備分理之又以三司不相聯屬歲命御史稽察之巡撫都御史以督攝之而府體益卑矣今之異於古者州屬府府之上為監司監司之上為臺察而又有小未安者

既云州而又云府名所當改定也元以行中書省
故名各省今兩畿曰南北直隸則各省當云某司
隸可也 封爵有故加以惡名者頡頁侯劉信一
本曰羨戛侯高帝微時過信其母戛釜以郤帝故
也不義侯子密蒼頭子密弒其主彭祖故也悖義
將軍佞濁子符承祖元魏倖臣以罪斥故也違命
侯李煜宋以其不降附故也它如宥罪歸命恩赦
之類亦多以降附封者若紂世鬼侯漢曲逆侯陳
平挾術侯劉昆皆以國邑鄉名封而不佳 女子
改國號稱帝者女媧氏周武氏稱制者漢呂后女

子封侯者女列侯陰安侯漢高祖丘嫂鳴雌亭侯
許負魯侯底氏子奚涓死事無子母封十九年薨
已上高祖封臨光侯呂嬃高后封鄼侯蕭何子嗣
侯祿薨高后封何夫人為鄼侯 女子為女官者
侍中後魏元乂妻胡氏齊高岳母山氏趙彥深母
傅氏南漢盧瓊僊女尚書魏明帝選知書女子為
之女學士唐德宗朝貝州宋氏五女若萃若昭若
華若倫若憲陳後主時宮人袁大捨等女博士宋
孝武朝諱蘭英 女子為男官者女將軍晉王廞
起兵顧深母孔氏年百餘以為軍司馬廞復以已

女為貞烈將軍唐行營節度許叔冀以衛州女子
侯氏滑州女子唐氏青州女子王氏歛血赴義奏
授為果毅 女子執國政者齊陸太姬司綸縵者
唐上官婕妤司史事者漢曹大家主兵者唐平陽
公主洗夫人然無官位 女子詐為男子而有官
位者齊揚州議曹錄事婁逞唐昭義軍兵馬使國
子祭酒石氏朔方兵馬使御史大夫孟氏蜀司戶
參軍黃崇嘏楊升菴詩話又有女校書薛濤女進
士林妙玉濤乃稱謂之詞妙玉宋女應誠封孺人

殺園雜記吏人稱外郎者古有中郎外郎皆臺省
官故借擬以尊之醫人稱郎中鑄工稱待詔木工

稱博士師巫稱太保茶酒稱院使此胡元名分不

明之舊習也

璣綴錄兩京五府以中左右前後為序南京總兵

則稍加弘壯五府之總兵坐後府蓋避中也南北太常

坐中府而北之總兵坐後府蓋避中也南北太常

寺皆居通政司之上而班次則通政在前蓋通政

在九列中執政衙門故也

南京國子監內號房皆無門限而成賢門門字無鈎

太祖謂秀才須出用不宜限隔故門皆去限且怒唐孟

舉書門字有鈎即用不宜限隔故門皆去限且怒唐孟

房以規矩準繩鋼紀法度為序每字二十粉跡宛然疏

以格致誠正備齊治平為序蓋各有取義也

潘子直詩話云禮天子六馬左右驂三公九卿駟

馬左驂漢制九卿二千石亦右驂太守駟馬而三

其有加秩中二千石乃右驂故以五馬為太守美

稱唐六典曰後漢州置別駕通典曰徙刺史行部

疆識畧八卷終

也時人以儉府為蓮花池故今繡幕